



## Fasnacht 2019

---

### Eher näbe de Schiine oder uf de Schiine – d` BVB im Wilde Weste

Hit duesch der ÖV z Basel miide  
demit nit all zu vvyll muesch liide

Beschwäärde kemme dääglic iine  
Wenn die gseesch do muesch jo griine

Der Chef vom Ganze, dasch kai Kunscht  
Isch der Wessels Hampe, wäär denn sunscht

Spaare wänn s die Knuppesaager  
jetzt spaare si bi Bus Raadlaager

S Motto haisst: s darf nit z vvyll koschte  
Jetzt duet däa Schissdrägg halt verroschte

Und der Wessels – das haisst vvyll  
Het, mee als sini Büss Profil

Die hänn drumm gar kains das isch weenig  
Und äär het kains – maint sig der Keenig

Doch nit nur d Rääder nämme Schaade  
S Klima stinggt im ganze Laade

Der Fisch foot jo am Kopf a stingge  
Wäärend d BVB duet singge

Macht der Lagler gmietlig Feerie  
Het kai Aanig vo der Materie

Mit däm Diräggtter isch s kai Wunder  
Laufft au in Zuekunft nit me runder

Mitarbaiter hänn nit z saage  
Deene blätzt scho bald der Kraage

D Cheffe interessiert s kai Drägg  
Die gheere aifach alli wägg

Der Lagler sotti unter s Dramm  
Und zwar nit als Opferlamm

Nai im Blaumaa untere krieche  
Das was sunscht die andre mieche

Um zum z gsee was weenig koschtet  
Halt au vyyl, vyyl schnäller roschtet

Und erscht d Schiine dasch jo bitter  
Isch e mittelbrächtigs Gwitter

Heebe kuum - wäär das nit tscheggt  
Muesch si ersetze, kuum verleggt

So dass bald kai Dramm me faare  
Faarsch halt mit em Laiterkaare

Und Basel wird zur Gaischterstadt  
S findet s kaine wirgligg glatt

Kunsch Dir vor wie im Wild Weschte  
Kasch das sälber live uss teschte

Ganove die duesch au no gsee  
S sinn die vo de BVB

Schiesse gäärn so um sich umme  
D Munition isch blind, dasch s dumme

Schuldig isch am Schluss am Ganze  
Der Waagefierer – däa kriegt uff e Ranze

D Verantwortig draht nit der Boss  
Däa sitzt uff em hoche Ross

Und zaigt uff däa wo jeede Daag  
Au wenn äär scho fascht gar nimm maag

Drämmli faart und Buss duet schtiire  
Mit de Gläbberkische wo dien giire

Sälber Schuld duet äär no saage  
Do drillt s uns jo grad der Maage

Das isch halt der wildi Weschte  
Wo die wo maine si sinn die Beschte

Nit die Beschte sind nur luut  
Und numme luege zu iirer Huut

Mir Bebbi löön die Ganove mache  
Wenn die halt so Schissdrägg mache

Ooni Drämmli isch s eso  
Macht uns das jo zimmlig froo

Und wenn mir dien vor d Saffre schtiire  
Kenne mir ungschteert Ändschtraich fyyre

---

### **Wotsch leere pfyffe oder drummle?**

Yschrybyge fir Buebe ab dr erschte Klass(7 jährig) fir d Drummel-und Pfyfferschuel, sinn an de Samschdige 16.03.2019 und 23.03.2019 jewyyls vom halber zwai bis am halber vieri am Nomidaag im Glyggekäller am Luftgässli 5 bim Banggverein.

---

Usskunft gitt dr Obmaa: Raphael Baumann  
[bebbi-obmaa@outlook.com](mailto:bebbi-obmaa@outlook.com)

---

unter baslerbebbi.ch findsch no mehr Informatione iber uns!

---